

## He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

### He whakarāpopoto

Pānuihia te whakarāpopoto ki te ākonga. He kōrero mō ētahi mea nukunuku, me ngā momo nukunuku o te ao ora nei.

### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te timatanga ki te mutunga o te pānui.

Kātahi nei te mīharo ko ngā momo nukunuku o ngā kīrehe rerekē! Matapakia ngā āhua rerekē o te nuku haere a te tangata i tētahi wāhi ki tētahi atu.

Kōrerorerotia te whānuitanga o ngā kupu rerekē mō ngā momo nuku rerekē. Whakamahia ngā kupu o te pukapuka nei hei timatanga.

## He Matapaki

### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakaputa ai ia i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.



## He whakapuaki māramatanga me ngā whakautu

1. He aha ngā mea e nuku ana, e neke ana, e haere ana i tēnei kōrero?
2. He pēwhea te haere a ētahi o aua mea?
3. Ko ēhea o aua mea kāore e whakamahi waewae hei neke haere?
4. Ki a koe, he aha pea te take i hanga ai te tangata i ngā tūmomo waka hari tangata ahakoa he waewae kē o te tangata hei hiko?
5. Mēnā ko koe te kaihanganga o tētahi mihini hei haere, ka hanga koe i te aha?

1. He ngata, he manu, he noke, he pūngāwerewere, he kōura, he ika.
2. Ka rerekē ngā whakautu.
3. Ko te ngata, te noke, me te ika.
4. Ka rerekē ngā whakautu.
5. Ka rerekē ngā whakautu.

## He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

### Te pūtake

**T** He tipako i ētahi rerenga whakamārama mai i te pukapuka.

### He whakatakinga ā-roto, he whakaharatau

I mua i te pānui o te pukapuka, matapakia te akoranga riro noa o te ākonga ki te pūtaiao o te nuku haere. He aha ngā kīrehe rerekē i whakamahi ai i ngā momo nuku rerekē?

Matapakia ngā ara ka whāia e te ākonga ki te rangahau i ngā momo nuku rerekē o ngā kīrehe. Kimihia ngā whakaaro o te ākonga mō ngā mea ka ākona e te tamaiti i roto i te kōrero.

Kia oti i te ākonga te pukapuka te pānui, titiro ki te āhua i tuhia ai te kōrero hei rārangi pātai me ngā whakautu, titiro hoki ki te āhua o ngā kārawarawa.

I pēhea te ako a tamaiti i roto i te kōrero ki ngā āhua nuku rerekē o ngā kīrehe? Tonoa te ākonga ki te whakarārangi i aua momo nuku. Whakatairitea ēnei ki tō te tangata momo nuku. Kia kite hoki te ākonga i te hononga o ēnei kīrehe ki tōna ake taiao.